

2767. XIV, 1-14 — Carta de el-rei D. Fernando de Castela para D. Dinis, rei de Portugal, pela qual lhe largava as vilas de Serpa, Moura com seus castelos, pois pertenciam a Portugal. Ciudad Rodrigo, 1295, Outubro, 20. — *Pergaminho. Bom estado. Selo pendiente.*

*Sepan* quantos esta carta vieren commo yo Don Ferrando por la gracia de Dios rey de Castiella de Leon de Gallizia de Sevilla de Cordova de Mursia de Jahen del Algarbe e señor de Molina por consseio e por octoidad e por otorgamiento de la Reyna Doña Maria mi madre e del infant Don Enrique mio tio e mio tuyo e por consseio de los otros ombres bonos de la mi tierra entendiendo e sabiendo nos verdad que los castiellos e las villas de Mora e de Serpia eran e de derecho devian seer del señorio de Portugal e que fueran e eran ende enagenadas muy sin rason e muy sin derecho e a grand peligro de las almas del rey Don Alfonso mio avuelo e de mi padre el rey Don Sancho e de la mia tenemos por bien e por derecho e por librar las almas de mio avuelo e de mi padre e de la mia de me partir e partome luego de los castiellos e de las villas de Mora e de Serpia e de todo otro derecho que yo y avia por qual rason quier que yo y oviese o de derecho ouvier a aver e entregelas luego al muy noble Don Doonis rey de Portugal e del Algarbe con todas sus pertenencias e sus terminos por o los avian en essas villas e castiellos quando eran del señorio de Portugal.

*Et* otorgo e tengo por bien que daqui adelante para todo sienpre sean esses castiellos e villas de susodichas del señorio de Portugal cuyas son de derecho.

*Et* prometo a buena fe por mi e por mis sucessores que nunca venga en ninguna manera contra estas cosas de susodichas nin contra ninguna dellas.

*Et* yo infant Don Enrique de susodicho tutor del dicho Don Ferrando viendo e sabiendo que las dichas villas e castiellos de Mora e de Serpa fueran enagenadas muy sin derecho e muy sin rason e commo non devia del señorio de Portugal assi commo dicho es. *Por* el poderio que yo he de tutor tengo por bien e otorgo e firmo todas las cosas de susodichas e cada una dellas et mando e otorgo que daqui adelante sean las dichas villas castiellos del señorio de Portugal para todo sienpre e que luego el dicho rey Don Deonis sea dellas entregue con todas sus pertenencias e derechos e terminos assi commo dicho es.

*Et* prometo a buena fe por mi e por el rey Don Ferrando que nunca venga contra este por mio nin por otro de fecho nin de Consejo et porque estas cosas de susodichas sean mas firmes e mas estables e que nunca vengán en dubda yo el dicho rey Don Ferrando mande sellar esta carta con mio sello de plomo.

*Et* nos la Reyna Doña Maria e el infant Don Enrique tuyo del dicho rey Don Ferrando e guarda de sus regnos mandamos sellar esta carta con nuestros sellos colgados.

*Dada* en Cibdad Rodrigo veynte dias de Otubre era de mill e tresientos e treynta e tres annos.

*Gutier* Xemenes la mando faser por mandado del rey e de la reyna Doña Maria e del inffant Don Enrrique su tuytor e guarda de los regnos de Castiella e de Leon.

*Yo* Bartholomeu Peres la fis escrevir.

(A. E.)